

■ NOVA SOCIETAD HELVETICA – SCUNTRADA SVIZRA

Premi da democrazia Albert Oeri

(cp) La Nova Societad Helvetica (NSH)/ Scuntrada Svizra (SS) s'engascha per la promoziun da la cultura democratica en noss pajais. Per quest intent surdat ella mintg'onn, sin proposta d'ina giuria d'experts independenta, il «Premi da democrazia Albert Oeri».

La ferma autonomia communal è ina caratteristica fundamentala dal federalissem svizzer e degna da protecciun. I resta il basegn prioritar che las instituziuns politicas sin level communal possian ademplir lur pensums a moda effizienta e daltiers dals burgais. Damai che las pretendiuns a l'administraziun communal creschan e las difficultads da mobilisar ils burgais per in engaschament en il sistem da milissa s'augmentan vegnan fusiunadas en Svizra pli e pli bleras vischnancas. La giuria dal «Premi da democrazia Albert Oeri» è persvasa ch'i saja decisiv per la cultura democratica da noss pajais da concepir questas fusiuns uschia ch'ils avantatgs da las structuradas decentralas e da participaziun vegnian mantegnidas. Ord quest motiv han ins tschertgà in project da fusiun exemplaric per pudair preschentar quel ad ina vasta publicitad.

Curt avant Nadal 2014 ha la NSH/SS concedi il «Premi da democrazia Albert Oeri», dotà cun 20 000 francs, al project Escholzmatt LU che circumscriba la fu-

siun da las vischnancas Escholzmatt e Marbach. Il project premià mussa cun tutta clerezza co ch'ina fusiun concreta è pussaivla cun sustegn dal suveran e cun mantegnair e schizunt promover ina ferma participaziun democratica. En quest connex duain duas qualitads caracteristicas vegnir menziunadas spezialmain: En emprima lingia fai surstar co che la populaziun è vegnida introducida pass per pass en il project, e quai cun ideas multifaras e gronda sensibilidat. Secundo èn tut las fasas vegnidadas documentadas a moda transparenta e lucida, sco sch'ils responsabels avessan vuli realisar in vademecum utilisabel per mintgin. La documentaziun dad Escholzmatt po servir sco basa per blers ulteriurs projects en ed ordaifer il chantun da Lucerna e sco impurtanta contribuziun al barat d'experientschas.

A chaschun da la surdada dal premi che duai succeder ad Escholzmatt vegnan ils avantatgs da la fusiun premiada a vegnir dilucidadas detagliadamain en ina laudatio. Cun ina menziun speziala duai er il project ambiziunà «Aggregazione del Bellinzonese», ch'è anc betg terminà, vegnir onurà. Quel promova la participaziun democratica a moda innovativa cun novas metodadas da lavur e da comunicaziun.